

Supervizor produžava mandat Nezavisnom odboru za izbor, imenovanje i praćenje rada šefa policije



Supervizor za Brčko Distrikt dr Raffi Gregorian danas je izdao Nalog supervizora kojim se privremeno produžava mandat Nezavisnog odbora za izbor, imenovanje i praćenje rada šefa policije i nalaže Skupštini Brčko Distrikta da izmjeni Zakon o policiji.

Sadašnji članovi Nezavisnog odbora će nastaviti da obavljaju svoje dužnosti i odgovornosti u svojstvu članova Nezavisnog odbora sve dok Skupština Brčko Distrikta ne imenuje nove članove Odbora u skladu sa izmjenama i dopunama Zakona o policiji koje treba usvojiti do 30. aprila 2011. godine i kojima se pojašnjava da aktivni policijski zvaničnici iz bilo koje teritorijalne nadležnosti u BiH ne mogu biti članovi Nezavisnog odbora.

Reforme u oblasti policije su u Bosni i Hercegovini u toku još od usvajanja prethodnog Zakona o policiji u Brčko Distriktu. Ove reforme imaju za cilj da otklone politički i interni pritisak policije na rad Nezavisnog odbora time što se aktivnim policijskim zvaničnicima onemogućava da budu članovi takvih odbora. Uslijed tih reformi Zakon o policiji Brčko Distrikta u svom sadašnjem obliku i u vezi sa onim što se odnosi na Nezavisni odbor je u tom dijelu bio pogrešno protumačen u toku nedavnog postupka izbora članova Nezavisnog odbora, te ga stoga treba ispraviti i otvoriti novi postupak.

Supervizor Gregorian se konsultovao sa predstavnicima Policijske misije Evropske Unije (EUPM), gradonačelnikom,

predsjednikom, zamjenikom predsjednika i šefovima poslaničkih klubova Skupštine Brčko Distrikta i odlučeno je da se ovo pitanje riješi putem Naloga supervizora u cilju otklanjanja bilo kakve pravne nesigurnosti ili nedoumice u vezi sa uslovima za imenovanje članova novog Nezavisnog odbora koji će biti imenovani u redovnom postupku nakon usvajanja ovih neophodnih izmjena i dopuna.